

## ILUARSIISSUT

Inatsisissatut siunnersuut 28. oktober 2009-meersoq, saqqummiussissutitaa inatsimmullu nassuiaatit ilanngullugit, taarserpai

(§ 25, imm. 1, Ombudsmandip akissarsiaqartinneqarneranut tunngasoq erseqqissarneqarpoq, inatsimmullu nassuiaatini ilanngullugu paasissutissiissutigineqarluni aalajangersagaq pineqartoq Ombudsmandip akissarsiatigut inissisimaneranik imaaliiallaannaq allanngortitsissanngitsoq)

**Siunnersuut uunga: Inatsisartut Ombudsmandiat pillugu Inatsisartut inatsisaat nr. xx, uu. qqqq 20xx-meersoq.**  
(Inatsisartut Siulittaasoqarfiat)

**Saqqummiussissut**  
(Inatsisartut Siulittaasuat)

### Siullermeerneqarnera

Inatsisartut Ombudsmandiat pillugu Inatsisartut inatsisissaatut siunnersuut Inatsisartut Siulittaasoqarfiat sinnerlugu matumuuna saqqummiunneqarpoq.

Inatsisartut Ombudsmandiat pillugu Inatsisartut inatsisaat atuuttoq ukiut 15-it matuma siorna akue-rineqaramili nutarterneqarsimangilaq.

Piffissap ingerlanerani allanngoriartorneq misilittagarilikkallu eqqarsaatigalugit maanna nutarteri-nissaq pisariaqalersorinarpoq.

Inatsisartut Ombudsmandianut malittarisassat atuuttut naapertorlugit inatsisissatut siunnersuut pi-ngaartumik makkuninnga allannguuteqarpoq:

- Ombudsmandip ingerlatsinerani maleruagassatigut tunngavigineqartut marluk (Inatsisar-tut Ombudsmandiat pillugu Inatsisartut inatsisaat aammalu Ombudsmandip ingerlataa-nut nalinginnaasumik aalajangersakkat) ataatsimoortinneqassapput.
- Naalliutsitsisarneq allatullu peqqarniingartumik, inuppalaanngitsumik imaluunniit ni-kanarsaataasumik pinnittarneq imaluunniit pillaasarneq akiorniarlugit FN-ip isumaqati-giissutaanut Kalaallit Nunaat ilanngunermigut nuna tamakkerlugu pinaveersaartitsiniar-luni suliamik aallartitsinissamik imminut pisussaaffilerpoq. Nakkutilliisussamik nutaar-luinnarmik pilersitsinermut taarsiullugu siunnersuutigineqarpoq suliaasaq taanna Om-budsmandimut taakkununnga assingusumik suliaqareersumut isumagisassangortinneqas-

sasoq. Taamatut aaqqiissuussinerup kingunerisussaavaa suliassatigut aningaasaqarnik-kullu atorluaaneq, tamannalumi Danmarkimi taamatut aaqqiismanermut assinguvoq.

- Ombudsmandip atorfeqarfinnik imaluunniit suliffeqarfinnik kiisalu atorfeqarfigisanut allanut sugaluartunulluunniit Ombudsmandip sulineranut ilaatinneqartunut misissuisinnaatitaanera malittarisassalittut aaqqiissuunneqassaaq, erseqqissarneqassaarlu Ombudsmandi suliffeqarfinnik assigisaannillu misissuinermini pissutsinik nalilersuisinnaammat suliffeqarfiup atuisuisa inuppalaassutsikkut inunnillu ikiuineranut tunngasut aallaavigalugit.
- Sulisoq atorfimmi isumagisassaminik sumiginnaasimappat eqqartuussiviit avaqqullugit suliassamik oqartussaasunik Ombudsmandip aallartitseqqusisinnaanera atorunnaassaaq (inuit pinnagit oqartussaasut pillugit naammagittaalliuit Ombudsmandimit suliarineqartussaammata). Taamaattorli sumiginnaasoqarsimatillugu eqqartuussiviit avaqqullugit suliassamik aallartitsinissamat Ombudsmandi suli *inassuteqarsinnaassaaq*.
- Naalackersuisunut ilaasortat akisussaassuseqarnerat pillugu inatsisartut inatsisaat naapertorlugu suliassamik aallartitsisoqartariaqartoq Ombudsmandi isumaqarpat Inatsisartunut Naalackersuisunullu ilisimatitsisussaataitaneq atorunnaarsinneqassaaq (tak. Ombudsmandip misissuineri inunnut ataasiakkaanut tunngasuunatik oqartussaasunut tunngasuunissaannik tunngavik). Taamaattorli naalackersuisunut ilaasortat akisussaassuseqarnerat pillugu inatsisartut inatsisaat naapertorlugu suliassamik aallartitsisoqarnissaanut Ombudsmandi suli *inassuteqarsinnaassaaq*.
- Ombudsmandi Inatsisunik Atortitsinermut Ataatsimiititaliaq akuersiseqqaartinnagu pi-sortat namminersortulluunniit suliffiutaanni, ingerlassaanni, atorfeqarfiutaanni imaluunniit peqatigiiffinni atuuffeqarsinnaanngilaq. Ombudsmandi pillugu inatsimmut maanna atuuttumut sanilliullugu aalajangersagaq nutaaq marlunnik allannguuteqarpoq: Inatsisartut pinnatik Inatsisunik Atortitsinermut Ataatsimiititaliaq akuersisartuussaaq, peqatigiiffinni suliffeqarnermut aamma atuuttussatut aalajangersagaq annertusineqarpoq.
- Suliamik aningaasartuutaanngitsumik eqqartuussivikkut suliarinninnissamik Ombudsmandi *inassuteqarsinnaavoq*. Tamanna Ombudsmandip maannamut periaasereriigaanik inatsisikkut aalajangersaaneruvoq.
- Oqartussat sulinerminni pineqartunut ilaatinneqartut allakkatigut oqaaseqaateqaqqullugit Ombudsmandip piunasaqarfigisinnavaa, assersuutigalugu oqartussat periusiat suliassaqarfimmiluunniit aalajangersimasumi inatsisunik qanoq paasinnineq pillugit. Tamanna Ombudsmandip maannamut periaasereriigaanik inatsisikkut aalajangersaaneruvoq.
- Ombudsmandip oqartussaasunut nakkutigisaminut attuumassuteqartuunnginneranik qulakkeerinnineq: Oqartussaasunit Ombudsmandip nakkutigisaanut ilaasunit (assersuutigalugu akissarsialerivik, naatsorsuuserivik imaluunniit innersuussisarfik aammalu suli-

sorisanut inissianik ingerlatsivik) sullissinissanik ikiorneqarnissaanilluunniit inniminnii-soqarpat, suliassap ingerlanneqarnissaa pillugu oqartussamik pineqartumik Ombudsmandip isumaqatigiissutaa ilaatinneqassaaq.

- Taaguutip Ombudsmandip illersugaanera: Taaguut ”ombudsmandi” inatsisikkut allamik aalajangersaasoqartinnagu allanit atorneqaqqusaanngilaq.
- Aalajangersagaq oqaaseqaalluunniit pillugu Ombudsmandi suliassanngortinneqarpat Ombudsmandimit innersuussut malillugu eqqartuussiviit suliaq tigujumangissinnaavaat.
- Nammineerluni suliniuteqarnertut aallartitami Ombudsmandip oqaatigisai oqaaseqaataagallartut il.il., oqartussaq misissuiffigineqartoq oqaaseqaateqaqqaartinnagu tamanit takuneqarsinnaatitaanngillat.
- Ombudsmandip inatsisilerituutut soraarummeersimanissaa pinngitsoorani piunasaqaataalersinneqarpoq. Allanguut maanna Ombudsmandiusumut sunniuteqassanngilaq, taanna inatsisilerituutut ilinniarsimasuummat.
- Ombudsmandi Inatsisartut Allattaanerattut akissarsiaqartinneqassaaq, taamaattorli pisutsit apeqqaatillugit Ombudsmandi inuttut immikkut tapeqartinneqarsinnaalluni. Ombudsmandi sulilernerminut soraarnerminullu atatillugu akiliunneqarluni angalasinnaatitaavoq, nuunnermilu aningaasartuutinik akiliunneqarsinnaatitaalluni.

Inatsisissatut siunnersuut piffissami 2009-mi 8. septemberimit 8. oktoberimut tusarniaassutigineqarpoq, tusarniaanermullu akissutit siunnersuummi immikkoortuni ataasiakkaani allannguissamut tunngavissiippat. Inatsisissatut siunnersuut inaarutaasoq Ombudsmandimit isornartussaqaartinneqanngilaq.

Inatsimmut nassuiaatit itisiliissutaasut innersuussutigalugit siunnersuut Inatsisartunut suliassanngortippara.